

HUW MACHNO (fl. 1585-1637), bardd

Enw: Huw Machno
Plentyn: John ap Huw Machno
Plentyn: Robert ap Huw Machno
Plentyn: Owain ap Huw Machno
Rhiant: Margaret ferch Robert ap Rhys
Rhiant: Owen ab Ieuan ap John
Rhyw: Gwryw
Galwedigaeth: bardd
Maes gweithgaredd: Barddoniaeth
Awdur: Evan David Jones

Mab Owen ab Ieuan ap John o Benmachno, a olrhieniail ei hynafiaid o Ddafydd Goch, Penmachno, mab ordderch **Dafydd**, tywysog Cymru. Ei fam oedd Margaret ferch Robert ap Rhys ap Hywel. Ni wyddys pa bryd y ganwyd ef, ond dywedir iddo farw yn 1637, a bod yr ysgrifen ' H.M. obiit 1637 ' ar ei garreg fedd ym mynwent Penmachno. Ymddengys iddo fod yn ddisgybl i **Siôn Phylip**, oherwydd yn ei farwnad i'r bardd hwnnw, yn 1620, cydnebydd dderbyn llawer ganddo yn ystod 35 mlynedd o gydnybyddiaeth. Dechreuodd y gyfeillach felly yn 1585. Cwynai **Richard Phylip** mewn cywydd iddo gollu ei gwmniaeth pan briododd. Yr oedd yn gâr ac yn fardd i deuluoedd **Gwydir**, Llechwedd Hafod, a'r **Dulasau**, a chanodd yn helaeth iddynt. Dywedir i arddwr **Gwydir** lunio delw'r bardd ar ei farch yn y coed. Canai hefyd i deuluoedd Gwynedd a sir Ddinbych, a chyn belled â **Gogerddan** yn y De. Bu'n ymryson ag **Edmwnd Prys**, a cheisiodd **Siôn Phylip** eu cymodi gan bwysleisio dysg Huw Machno, ei wybodaeth o Ladin ac o iaith moliant y beirdd. Ystyriai **Siôn Phylip** fod arno ragoriaeth mewn rhieingerdd, moliant, a dyfalu. Cadwyd dros 150 o'i gywyddau a'i englynion ar wasgar yn y llawysgrifau. Ceir darnau yn ei law ef ei hun yn llawysgrifau **NLW MS 433B**, **Peniarth MS 327**, **Mostyn 146**, **B.M. Add. 14998**, **Caerdydd 83** (sef llyfr **Syr John Wynn** o Wydir), **Christ Church 184**, ac efe a ysgrifennodd bron y cwbl o lawysgrif **NLW MS 727D**, sy'n cynnwys cryn dipyn o'i waith ef ei hun. Rhoes y llyfr hwn i Evan Llwyd, Dulasau. Ymhlith y marwnadau a ganodd y mae rhai i **Patrin o Ferain**, 1591, **Sion Tudur**, 1602, yr **esgob William Morgan**, 1604, **Siôn Phylip**, 1620, a **Thomas Prys** o Blas Iolyn, 1634.

Bu iddo o leiaf dri o blant: Owain (a fu farw 1619, yn 11 oed, pan ganodd ei dad ei farwnad), Robert, a John.

Awdur

Evan David Jones, (1903 - 1987)

Ffynonellau

Geirlyfr Bywgraffiadol o Enwogion Cymru (1870), 705

y llawysgrifau a nodir uchod

Archifau LIGC: **Peniarth MS 288**: Pedigrees

Dolenni Ychwanegol

Wikidata: **Q20733229**

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n **tudalen codi arian** am ragor o wybodaeth.

frannu

Arddull APA

x

Jones, E. D., (1953). HUW MACHNO (fl. 1585-1637), bardd. *Y Bywgraffiadur Cymreig*. Adferwyd 11 Tac 2024, o <https://bywgraffiadur.cymru/article/c-HUW0-MAC-1585>

Clippwr

LGC
NLW

LLYFRGEL
THE NATION



Ysgrifeddiadau
Llywodraeth Cymru
Copied by
Welsh Government